

Ôsê Bàu Patô Adroi

Hiniq wa Bàu Xèm Da Sech:

Hiniq wa Bàu Xèm Da Sech: Sech cô khoi jah achìh hiniq Ôsê, aih hiniq tiaq mangai capoch thai Boc Plình. Jò da Ôsê loh dìq ca hì lùch da Diac Is-ra-ên. Aih jò i 6 bùa wèq cwìang ta jò 25 hanam. Hanam 733 A.C. Diac A-si-ri raliang piang Is-ra-ên. Hanam 722-721 A.C. Sa-ma-ri 'bìq rùp 'nong lam khoi dèh Diac. 'Màng aih Diac pah 'ngeo ca mat mahì loh - aih Is-ra-ên - khoi trùh lùch.

Mangai Achìh wa Hanam Achìh:

Ôsê anoi 'noh bàu adroi Diac A-si-ri rùp yǒc Diac pah 'ngeo ca mat mahì loh wa atìq ca Amôt, mangai capoch thai Boc Plình. Ôsê broq bìac capoch bàu thai ca Boc Plình 70 hanam.

Bàu Anoi:

Bàu phàn adroi da sech khoi yǒc 'nhòng rìh da cadraq da Ôsê òiđiq aliah bìac dèch claih da Chuaq. Chuaq loq waq con jàn da wêh jao Haq, Haq bùi manoh ahlài wì 'nhac ca wì khoi cađac trong Haq bàc yàng. 'Nah yàng baiq ta sech anoi 'noh bìac jàn Is-ra-ên cùh waiq dua 'mù da mangai Diac 'noiđ. Ôsê creò jàn cađac dèh manoh broq tôiđ wìh hlài tiaq Chuaq. Tàng ùh enh 'bìq raliang piang, ep tawìh hlài tiaq Chuaq.

Rìm 'Nat:

Mai ùh wèq dèh manoh wa ǒng wèq dèh manoh: 1:1—3:5

Jàn ùh wèq dèh manoh wa Boc Plình ma wèq Dèh Manoh: 4:1—13:16

A. Biac ùh wèq dèh manoh da Is-ra-ên: 4:1—6:3

B. Is-ra-ên 'bìq baxa: 6:4—10:15

C. Can Loq Waq da Chuaq cajap hloi hloi: 11:1—14:9

Biac Ùh Cajap Manoh Da Jàn Is-ra-ên Wa Biac Baxa

¹ I bàu Chuaq doi ca Ôsê, con Bê-ê-ri, ta 'nhòng da bùa Ôxia, Jôtham, Acha, Ê-xê-chia da Juda, wa bùa Jê-rô-bô-am, con Jôach, da Is-ra-ên.

² Jò Chuaq baxèm doi ca Ôsê, Chuaq doi ca haq: “Lam yǒc mai tango anang beq, ðòiq jah xa-ông con tango anang; taiq jàn cô khi broq tôiq tango anang, cađac Chuaq.” ³ 'Màng aih, Ôsê lam yǒc Gôme, con Đip-la-im broq mai. Mai haq ǒi jiang xa-ông ca haq mòiq toq con calô.

⁴ Jò aih Chuaq doi ca haq: “Hiniq ca con nga aih Jê-rê-ên, ma jah 'màng aih ǒi toq 'biaq hòm, au tabroq chao ca hnem Jêhu taiq haq khi broq ta-ùc mahem ca hnem Jê-rê-ên, wa pǒt đac taneh Diac da hnem Is-ra-ên. ⁵ Ta hi aih au jah goh đac panenh da Is-ra-ên ta thòng Jê-rê-ên.”

⁶ Mai haq ǒi jiang hòm hi khi xa-ông mòiq toq con cadrì. Èh Chuaq doi ca Ôsê: “Hiniq ca con nga cô Lô-ru-ha-ma, taiq au pi xa-öch ca hnem Is-ra-ên hòm, ðòiq Au baxǒng tôiq ca wì haq. ⁷ Mahaq Au xa-öch ca hnem Juda; jah dǒih claih wì haq, ma jah 'màng aih Au cô Chuaq Boc Plình

da wì haq òiđiq dôiđh claih wì haq; Au ùh nhet ca i panenh, chang, axêh lình còi axêh loq biac tajêh poh leq.”

⁸ Atiq ca Lô-ru-ha-ma cađac tôh, miq haq ôi jiang hòm, hi khoi xa-ông tam mòiđ toq con calô.

⁹ Chuaq doi: “Hiniq ca con nga aih Lô-am-mi, taiq pì pi xài jàn Au wa Au pi broq Boc Plình pì.

¹⁰ “ ‘Nhac ca ‘màng aih, con calô Is-ra-ên xôq jah cràm tìah ca braih diac raxìđ, ùh òiđ tống, ùh jah rên sôđ pliang braih; nòi khoi achìh bàu: ‘Pì ùh xài jàn Au,’ èđ doi hlài: ‘Pì con calô da Boc Plình ma rìh hloi hloi.’ ¹¹ Con caiđ Juda wa con caiđ Is-ra-ên jah pajùm hlài ti dabau; jah ràih yốc pajùm mòiđ toq cwan; wì haq jah yốc hlài dèh taneh, ma jah ‘màng aih cô mòiđ hì òiđ jađ càn caiđ ta thòng Jê-rê-ên.

2

Bìac Baxa Wa Bìac Am Xôđ Ramốt

¹ “Creo ca oh òađ calô da ìh aih: ‘Am-mi,’ wa oh òađ cadrì da ìh aih: ‘Ru-ha-ma.’

² “Ta’mòđ tôiđ ca miđ pì, ta’mòđ beđ,
taiđ haq pì xài mai au,
au pì xài ống haq!

Thê haq cađac biac tango anang ta hadrò haq
wa biac tango khoi enh tôh haq,

³ Tàng ùh èh, au luch haq loh ca rahòng,
tìah ca hì ‘nang xa-ông ca haq;

hadai brođ ca haq loh tìah ca ðùng wang wê,
tìah ca taneh croh,
brođ ca haq cachìt ca croh ranống.

⁴ Au ùh xa-ốch ca con caiđ haq,

taiq con aih con da biac tango anang.

⁵ Joq 'nàng 'màng aih, miq wì haq khoi broq tôiq
tango anang,
mangai ôi jiang ca wì haq khoi broq biac
camaih.

Ma jah 'màng aih haq doi: 'Au lam tiaq dèh 'bài
mangai au ma enh waq,
wì am ca au 'benh, diac,
xàc triu, bai, dàu wa dahwèq ôq.'

⁶ Taiq 'màng aih, Au yǒc hila crùh tət trong haq,
broq panət dudan ca haq, ðòiq haq chaq ùh
hnoq trong loh.

⁷ Haq hnan tiaq mangai haq ma enh waq mahaq
ùh tem,
chaq mahaq ùh hnoq.

Hi khoi haq doi ca dađeh:

'Manàiq au wìh hlài dèh ta ǒng ma baxèm,
ma jah 'màng aih jò aih au yi xùang ca
manàiq.'

⁸ Joq 'nàng haq ùh loq Au cô khoi am ca haq 'mau
mì,
alac neo wa dàu,
Au khoi am ca haq bàc 'bac wa wang
mahaq wì haq lam tadreo ca Ba-an.

⁹ "Taq 'màng aih, ta jò gat, Au yǒc hlài dèh 'mau,
wa alac nho neo da Au jò mùa.

Au hadai yǒc hlài dèh xàc triu wa bai habùac da
Au,

aih bai ðòiq ca bàng chac rahòng da haq.

¹⁰ Jò aih, Au pa'noh biac 'mèq haq
ôì jang ngìa mangai haq ma enh waq,
ùh i ca cabô jah ðóih haq claih enh tì Au.

¹¹ Au tət đac biac lem bùi da haq,

- 'bài hiniang, hì khê neo,
hì Sabat wa dìq ca 'bài hì lè càn da haq.
- 12 Au raliang đac 'bài long nho wa long póc haq,
'bài long ma haq doi: Cô 'bac cùng da 'bài
mangai ma loq waq am ca au.
Au jah broq ca 'bài long aih loh rôm
wa 'bài ngè rôm caq đong.
- 13 Au baxa haq taiq haq bủh nhổng ca 'bài dua
'mù Ba-an,
haq halǒng hatai,
wa bac ngè canaq 'bac,
hnan tiaq mangai haq ma enh waq,
mahaq haq hèt ca Au!"
Chuaq doi 'màng aih.

Diac Is-ra-ên Jah Ha'naoq Hlài

- 14 "Tiaq 'màng aih, cô Au alúan haq,
'nong haq mùt ta ðùng wang wê,
capoch ca haq bàu rangot.
- 15 Enh nòi aih, Au am ca haq wùan nho,
broq ca thòng tamang Acô wìa 'mang ngèh
gòm.
Ta nòi aih, haq tiaq bàu Au tìah ca jò haq ỏi thì,
tìah ca hì haq loh khoi enh taneh Aicàp."
- 16 Chuaq doi:
"Hì aih èh ìh creó ca 'Au ǒng,'
pi creó ca 'Ba-an hòm.'
- 17 Au jah don đac hiniq da dua 'mù Ba-an loh
khoi enh hacùng haq;
èh pi i ca cabô ràu hiniq aih hòm.

- 18 Ta hì aih, Au jah broq wêh jao ca pì wa ca 'bài
ngè ta rôm,
ca 'bài chìm ta plình, wa ngè 'yêq ta crống
taneh.
Au goh đac wa bahnhung đac 'bài panenh, 'bài
chang,
wa biac tajêh poh khoi ca crống taneh,
wa am ca jàn jah catèm.
- 19 Au ta'nèp ca ìh hloi hloi;
Au ta'nèp ca ìh ta biac ta-atoq wa biac lem
jang,
can xa-öch xam manoh loq waq wa can xa-
öch.
- 20 Joq 'nàng, Au ta'nèp ìh tiàh ca mai da Au xam
manoh wèq dèh bàu;
jò aih ìh jah loq ca Chuaq."
- 21 Chuaq doi: "Ta hì aih,
Au jah tèo bàu waiq dang,
Au jah tèo bàu waiq dang da 'bài lòp plình,
èh 'bài lòp plình jah tèo bàu waiq dang da
taneh.
- 22 Taneh jah tèo bàu am 'mau,
am alac nho neo, am dầu,
piq hiniq cô jah tèo bàu ca Jê-rê-ên.
- 23 Khoi èh Au jah rai haq ca Au ta taneh.
Au xa-öch ca mangai 'nhòq jah xa-öch,
hi doi ca jàn ùh xài jàn Au nèh: 'Ìh jàn Au!
Wa jàn aih tèo: 'Ìh Boc Plình nhèn.' "

3

Ôsê Patìah Ta'nèp Yàng Baiq

¹ Chuaq doi ca au: “Lam yõc hlài mangai cadrì khoi tango anang wa khoi i mangai ǒng neo tau beq, 'màng ca Chuaq xôq loq waq ca con caiq Is-ra-ên 'nhac ca wì haq khoi tawìh cùh waiq 'bài kiac ma'noiç, wa enh caq 'benh plì nho croh.”

² Màng aih au khoi rǒt hlài gu cadrì aih xam 15 capiac 'bac wa 36,5 lît 'mau mat. ³ Khoi èh au doi ca haq: “Oh òi ti au bàc hì oq; paq tango anang wa paq broq mai mangai calô leq ma 'noiç, èh au broq ca oh hadai 'màng aih.”

⁴ Ma jah 'màng aih dùnh hì, con jàn Is-ra-ên ùh i ca bùa, ùh i ca cwan, ùh dèch am ngè tadreo, ùh i ca'böng tadreo, ùh i ca êphot, wa ùh i ca dua 'mù ta hnem. ⁵ Khoi ca aih, con caiq Is-ra-ên wìh hlài chaq dèh Chuaq Boc Plình, wa Đawit bùa cla wì. Wì haq crè yùq wìh hlài ta Chuaq, wa jah xôq ramǒt enh Haq.

4

Boc Plình Ta'miaq Ca Diac Is-ra-ên

¹ Ô con jàn Is-ra-ên, tamàng bàu da Chuaq beq ma jah 'màng aih Chuaq ta'mòq tôiq ca jàn gùng cô;

“Taiq ta gùng cô ùh i ca biac wèq dèh bàu, ùh i ca manoh loq xa-ǒch, hadai ùh canao loq ca Boc Plình.

² Ta aih toq hnoq biac hanip, biac tacwàiq amòng, biac jêh đac mangai, biac atùng, wa tango anang.

Wì haq broq biac ngang dù, mahem ta-ùc enh 'nhèq ca mahem.

3 Taiq 'màng aih, taneh cô jah mango;
 mangai jàn ma òi ta aih hõnh manoh,
 'bài ngè ta rôm wa chìm ta plình hadai 'màng
 aih;
 ca ta diac raxìq hadai pi i.

4 “ 'Nhac ca 'màng aih, paq i cabô ta'mòq tôiq,
 paq i cabô lech
 taiq jàn ìh tìah ca mangai
 rahen ca pajàu Boc Plình.

5 Ìh catõih tacro jò dahì;
 'bài mangai capoch thai Boc Plình hadai
 catõih tacro tí ìh jò damang,
 wa Au jêh đac miq ìh.

6 Jàn Au 'bìq jêh đac taiq thiùq can 'nì loq ro
 rang.

“Taiq ìh khai ùh nhàn yõc biac 'nì loq Au,
 Au hadai cađac ìh ùh ðoìq ìh broq pajàu ca
 Au hòm;
 taiq ìh khai hèt ca ranenh Boc Plình cla ìh,
 Au hadai jah hèt ca con caiq ìh.

7 Wì haq xa-ông loh bàc dàng leq,
 èh broq tôiq tablàq hlài ca Au bàc dàng aih;
 Au jah halìh biac 'ngah 'ngai da wì haq loh
 biac camaih.

8 Jò jàn 'ràng ngè tadreo ca tôiq lòi, pajàu i
 dahwèq caq;
 'màng aih pajàu bùi.

9 Cô èh, jàn 'màng leq pajàu hadai 'màng aih;
 èh Au baxa wì haq taiq biac broq wì haq,
 jêh chao wì haq taiq biac wì haq broq.

10 “Wì haq caq mahaq ùh panàc,
 tango anang mahaq ùh i ca con,
 taiq wì haq khoi cađac Chuaq wa pi hèm trùh ca
 Haq hòm.

11 Bìac tango anang,
 bìac ôq alac nho wa alac nho neo,
 khoi broq ca jàn Au loh ca blùng.

12 Jàn Au waiq bòch dua 'mù broq xam long,
 wa xin long canhra da pajàu ngan plình anoi
 'noh ca wì haq.

Taiq bìac tango anang broq ca wì haq lac trong,
 wì haq tango anang wa blàq hlài Boc Plình.

13 Wì haq dèch am ngè tadreo ta bôh wang,
 bùh hòh xua thùm ta 'bài go,

ti xem long rayai, long yùang liu, long crech,
 ma jah 'màng aih i yàp hangèp.

Taiq 'màng aih 'bài con cadrì ìh broq tango
 anang,

wa 'bài mai da con ìh loh ca tango anang.

14 “Au ùh baxa 'bài con cadrì pì
 taiq wì haq broq tôiq tango anang,

hadai ùh baxa mangai cadrì padon ta'nèp pì
 taiq tôiq tango anang;

ma jah 'màng aih 'bài mangai calô pì lam ti 'bài
 gu cadrì tango anang,

wa dèch am ngè tadreo ti gu cadrì tango
 anang ta hnem cùh waiq.

Taiq 'màng aih jàn leq ùh 'nì loq, èh 'bìq
 raliang piang.

15 “Ô Is-ra-ên, 'nhac ca ìh khoi broq tôiq tango
 anang,

mahaq paq ðòiḡ Juda broḡ tôiq!

“Paq mùt ta Gingan.

Hadai paq tõi Bêt Awen,
nòi dua 'mù ðòiḡ yõi hiniḡ Chuaḡ pachac,
doi: 'Nhò hiniḡ Chuaḡ ma rìh hloi.’

16 Taiḡ Is-ra-ên cadoḡ manoh
tìah ca 'bo adrùh cadoḡ manoh,
'màng aih Chuaḡ ma wèḡ ban wì haḡ,
ajènh wì haḡ mùt ta ðùng nhat rùng rai tìah
ca ban triu 'mòh?

17 Ep-ra-im cùh waiḡ dua 'mù,
hì mac da haḡ beḡ!

18 Wì ôḡ bù bia khi ðiḡ,
èh hì lam tango anang hloi;
mangai wèḡ wì enh ca biac 'mèḡ yi hnao enh
waḡ biac lem.

19 Cayeo hlôi wì haḡ tarõḡ ðiḡ,
wì haḡ jah camaih ðèh ca nèḡ tadreo 'ng-
wan.”

5

Boc Plình Lech Jàn Is-ra-ên Taiḡ Wì Caḡac Tiaḡ Trong Haḡ

1 “Ô 'bài pajàu, tamàng biac cô beḡ!

Ô mangai wèḡ cwìang da Is-ra-ên khòh
hamang oḡ!

Ô mangai ta hnem bùa halang don tamàng beḡ!

Biac hadrah khi trùh tajaḡ hlài ca pì,
taiḡ pì khi 'nong jàn 'biḡ hlech hlàm taiḡ biac
cùh waiḡ dua 'mù ta Mitba wa Tabô.

2 Wì haq khoi tablàq ca Au wa khoi mùt can rìh
 ùh hruah,
 taiq 'màng aih Au baxa dìq dǒng wì haq.

3 Au loq ca Ep-ra-im,
 Is-ra-ên hadai ùh jah cadoc ca Au.
 Ep-ra-im khoi broq tôiq tango anang!
 Is-ra-ên loh ca amùà!

4 “Bìac broq da wì haq tăt khech cla wì haq wìh
 hlài ta Boc Plinh;
 taiq manoh enh toq tango anang da wì haq,
 'màng aih wì haq ùh canao ca Chuaq.

5 Bìac loq catèh da Is-ra-ên khoi takian hlài cla
 haq,
 Is-ra-ên wa Ep-ra-im tacro dèh ta tôiq lôì;
 Juđa hadai tacro ti wì haq.

6 Wì haq lam dèh ti 'bài calùh trìu calùh 'bo,
 ðòiq chaq Chuaq;
 mahaq chaq ùh hnoq,
 ma jah 'màng aih Chuaq khoi talùi dadeh ca
 wì haq.

7 Wì haq khoi blàq blènh Chuaq
 taiq wì haq khoi xa-ông loh 'bài con caiq
 tango anang.
 Manàiq cô hì khê neo jah lǒn wì haq
 wa cùng hang wì haq dìq 'bìq raliang đac!

8 “Hlôi ken ta Ghi-bê-a beq,
 hlôi ken ta Rama beq!
 Cachech bàu dèh ta Bêt Awen beq!
 Ô Bên-ja-min, linh wì ǒi enh crǒng ìh 'mat!”

9 Ta hì baxa,
 Ep-ra-im jah loh ca wang wê;

Au khoi anoi 'noh ca hadrông hadrech Is-ra-ên
loq bìac aih jah trùh.

10 'Bàì cwan Juđa tìah ca mangai 'nhac acang;
Au jah ùc can nòih au ca wì haq tìah ca ùc
điac.

11 Ep-ra-im 'bìq padit padiang,
'bìq bahech đac ta bìac hadrah,
taìq haq khoi cadàu tiaq trong hnài con
mangai.

12 Taiq 'màng aih Au broq tìah ca con un ca Ep-
ra-im,
wa ca xinoi Juđa au tìah ca ngè búc hech.

13 “Jò Ep-ra-im khoi loq ca dađeh i 'bình,
wa Juđa khoi loq ca dađeh i habau,
èh Ep-ra-im lam trùh ta mangai A-si-ri,
thê trùh ta bùa Jarep.

Mahaq haq ùh jah broq brêh ca pì,
hadai ùh cật habau pì.

14 Ma jah 'màng aih au tìah ca baco hlari ca Ep-
ra-im,
tìah ca baco hlari òi thì ca Juđa.

Joq 'nàng Au cap hich hi khoi lam hloi;
Au rùp 'nong ùh i ca cabô jah đòih.

15 Au lam mùt ta nòi Au òi,
trùh jò wì haq canao ca dađeh broq tôiq
wa ti chaq Au.

Ta jò ranàc,
wì haq òiq ca manoh ti chaq Au.”

6

Jàn Padreo Hlài Bàu Lech Ca Boc Pình

1 “Trùh beq, bèn wìh hlài ta Chuaq;

- taiq Haq khoi hich bèn,
 mahaq Haq khoi broq brêh ca bèn;
 Haq jêh bèn,
 mahaq Haq khoi càt hlài habau bèn.
- 2 Ta baiq hì, Haq broq brêh ca bèn;
 hì piq Haq dèch bèn yòng;
 bèn jah rìh òi jang ngĩa Haq.
- 3 Bèn khòh canao loq ca Chuaq;
 wa phai dìq dèh padren canao loq ca Haq
 beq.
- Haq jah trùh ta bèn,
 biàc aih joq 'nàng tiàh ca mat mahì tǒc jò
 daxroq,
- Haq trùh ta bèn
 tiàh ca mè pùc taneh jò padrang.”
- 4 “Ô Ep-ra-im! Au broq 'màng leq ca ìh cô èh?
 Au broq 'màng leq ca ìh cô èh ô Judà?
 Taiq manoh loq waq ãa pì tiàh ca yùc daxroq,
 tiàh ca diac ngom jò òi xroìh.
- 5 Taiq 'màng aih Au khoi pǒt pì tang pǒt nhò bàu
 mangai capoch thai Boc Plình;
 Au khoi jêh wì haq xam bàu loh enh hacùng
 Au.
 Biàc hadrah ãa Au plòh loh tiàh ca can 'ngah.
- 6 Ma jah 'màng aih Au enh ca biàc loq wèq dèh
 bàu thai ca ngè tadreo,
 biàc canao loq ca Boc Plình yi hnao ca ngè
 tadreo bùh.
- 7 Mahaq 'màng ca Ađam, wì haq khoi broq tôiq
 ca bàu wêh jao,
 òì ta aih wì haq khoi blàq Au.
- 8 Ga-la-at aih phòq ãa 'bài mangai dù,

- ti trong bình ca teo mahem.
- 9 'Bàì pajàu tìah ca mangai atùng gòm rap jêh mangai lam cwa ti trong,
wì haq jêh đac mangai lam ta Sichem;
wì haq broq bàc tôiq dù!
- 10 Ta hnem Is-ra-ên, Au khoi hnoq bìac ramòt,
ta aih Ep-ra-im khoi broq tôiq tango anang,
Is-ra-ên loh ca amùa.
- 11 “Ìh hadai ô Judà,
Au khoi padon jò gat ca ìh,
jò Au ha'naoq hlài bìac xôq ramòt ca jàn Au.”

7

Tôiq Ngang Dù Da Ep-ra-im

- 1 “Jò Au broq brêh ca Is-ra-ên,
èh tôiq lôì da Ep-ra-im
wa bìac ngang dù da Sa-ma-ri jah patô loh
ro rang,
taiq wì haq khoi broq trong amòng;
mangai atùng mùt enh trom,
mangai tablah jêh raliang enh gùng.
- 2 Wì haq ùh hèm ta manoh Au jah hmàng rìm
bìac dù da wì haq.
Manàiq bìac dù wì haq
'ban 'bua wì haq ôi jang ngìa Au.
- 3 “Wì haq yốc dèh bìac dù broq lem manoh bùa,
yốc dèh trong amòng broq lem manoh 'bài
cwan.
- 4 Dìq đống wì haq tango anang,
tìah ca ùnh khàng ta tanùh phiang 'benh,
'nhac ca mangai phiang 'benh khoi hêq

- ca trùt ùnh enh jò wàt dàc trùh jò dàc bôq.
 5 Ta hì lem bùi da bùa bèn tǒc broq bùa,
 'bài cwan bù alac nho loh ca ùh hrǒc;
 bùa lem bùi rùp tì ca 'bài mangai loq jù lê.
- 6 Manoh wì haq bình halùih trong tình,
 tiàh ca ùnh khàng dèh ta tanùh;
 mangai phiang 'benh cùi hliac 'ngah ca mang
 mahaq trùh daxroq ùnh xôq ǒi cheo dèh.
- 7 Dìq dǒng wì haq tôq tiàh ca tanùh ùnh,
 lǒn apom dèh 'bài cwan.
 Dìq dǒng 'bài bùa wì haq loh ca raliang,
 mahaq ùh i cabô ta wì haq creo dang Au.
- 8 "Ep-ra-im alôn ti 'bài jàn 'noiq;
 Ep-ra-im tiàh ca 'benh phiang 'nhòq blàq.
- 9 'Bài jàn Diac 'noiq khoi lǒn padren haq,
 ma cla haq ùh 'nì!
 Xàc gàu haq khoi co tang nòi,
 ma cla haq ùh loq!
- 10 Biac catèh da Is-ra-ên patô hlài da haq;
 'nhac ca wì haq glàm biac 'màng aih
 mahaq xôq ùh wìh hlài dèh ta Chuaq Boc Pình,
 wa hadai ùh chaq Haq!
- 11 "Ep-ra-im tiàh ca chìm trù blùng,
 ùh i ca manoh rabiaq,
 taiq haq creo dang Aicàp wa A-si-ri.
- 12 Jò wì haq 'nang loh lam ta aih, Au tang hlàm
 ca wì haq.
 Au broq ca wì haq taclìh tiàh ca chìm taclìh;
 Au baxa wì haq
 tiaq troi bầu khoi anoi 'noh ca tagop wì haq.
- 13 Nan xa ca wì haq,

taiq wì haq khoi cađac Au;
 can raliang hech ta-ùc ta wì haq,
 taiq wì haq khoi broq tôiq tajraq hlài ca Au.
 'Nhac ca Au enh dèch wì haq,
 mahaq wì haq capoch amòng tajraq hlài ca
 Au.
 14 Wì haq ùh òiq ca manoh
 ðòiq creo dang ca Au jò wì haq hràng rayoih
 dèh ta jùang;
 wì haq gop yõc 'mau wa alac nho neo ca dađeh
 wa tajraq hlài ca Au.
 15 Au raq khoi hnài wì haq, khoi broq dèh ca tì
 wì haq,
 'nhac ca 'màng aih, wì haq xôq chaq trong
 dù tajraq ca Au.
 16 Wì haq tawìh tiaq bìac ma dech 'ngwan.
 Wì haq tìah ca panenh khoi tagùt tagech.
 Cwan wì haq tacro ca pla chang,
 ma jah 'màng aih taiq rapet wì haq hloh bàu
 padèch.
 Wì haq wìa broq do
 ca mangai Aicàp.”

8

Is-ra-ên Rai Cayeo Wì Jah Gat Bahùt

1 “Dèch ken ti hacùng 'mat hlôi beq!
 Ma jah 'màng aih mangai tagit tajraq hlài ca
 hnem Chuaq tìah ca cliang,
 padon loh taiq Is-ra-ên khoi blàq wêh jao Au,
 wa tajraq hlài ca ranenh Au.
 2 Is-ra-ên creo ca Au:
 ‘Ôi Boc Pình da Is-ra-ên, nhèn loq ca ìh!’

- ³ Is-ra-ên khoi cađac trong lem,
 mangai tagit jah tajraq hlài nnan tiaq haq.
- ⁴ Wì haq yõc mangai tõi broq bùa mahaq ùh
 bòch Au,
 yõc mangai tõi broq cwan ma Au ùh 'nì.
 Wì haq 'noh dèh wang 'bac broq ca dađeh dua
 'mù,
 'màng aih wì broq ca dađeh 'bìq raliang đac.
- ⁵ Ô Sa-ma-ri, dua 'mù 'bo con ìh khoi 'bìq hwenh
 đac!
 Can nòih Au khoi plòh loh tajraq hlài ca wì
 haq trùh
 jò leq ma wì haq pi broq tôiq cô èh?
- ⁶ Ma jah 'màng aih 'bo con aih bìac tì da Is-
 ra-ên broq loh,
 mòiq mangai thòq khoi broq loh,
 'màng aih, bìac aih ùh xài Boc Plình.
 'Bo con da Sa-ma-ri
 jah padah loh tang ha'nech.
- ⁷ “Wì haq khoi rai cayeo
 wì jah gat bahùt.
 'Mau wì haq ùh loh plì,
 ùh loh dác;
 tàng loh,
 èh xôq jàn Diac 'noi q lòn yõc.
- ⁸ Is-ra-ên khoi 'bìq lòn.
 Manàiq wì haq ỏi ta'ne 'bài jàn
 tìah ca dahwèq ùh loh cleq.
- ⁹ Wì haq tìah ca lùa rôm cadàu tõi ta A-si-ri;
 Ep-ra-im khoi tech dađeh đòiq rõt, èh
 manoh mangai
 jah loq waq ca haq.

- 10 'Nhac ca wì haq rôt jah manoh ta 'bài jàn Diac
 'noiq,
 mahaq Au gop ðòiq wì haq.
 Pi dùnh hòmh wì haq èh ep broq hapǒng
 enh 'neq ca bùa wa ca 'bài cwan.
- 11 “Taiq Ep-ra-im khoi broq tam bàc toq 'bǒng
 tadreo ðòiq broq tôiq,
 èh 'bài 'bǒng tadreo khoi wìa nòi broq tôiq
 lôl.
- 12 Au khoi achìh ranenh Au ca haq tiaq 10.000
 trong,
 mahaq wì haq ngan ùh loh cleq.
- 13 'Nhac ca wì haq dèch am nègè tadreo ca Au,
 caq jam nègè tadreo aih,
 mahaq Chuaq xôq ùh nhàn wì haq.
 Manàiq Haq hmàng hlài tôiq lôl wì,
 wa baxa wì;
 wì ep wìh hlài ta Aicàp!
- 14 Is-ra-ên khoi hèt ca Boc Plình ma broq loh wì
 haq;
 wì haq toq broq tam hnem tadreo càn;
 Juđa khoi bàc tam 'bài phòq cajap.
 Mahaq Au 'noh ùnh ta 'bài phòq haq,
 wa ùnh aih cheo 'bài hnem rahù càn.”

9

Ep-ra-im 'Bìq Baxa

- 1 Ô Is-ra-ên, paq lem bùi padràu hau troi 'bài jàn
 'noiq!
 Taiq ìh khoi tango anang,
 cađac Boc Plình ìh.

- Ìh ham ca 'bac tango anang ta xàn len 'mau ìh.
- ² Xàn len 'mau, wa hám hadroch plì nho ùh nui ban wì haq;
alac nho neo xôq thìuq ca wì haq.
- ³ Wì haq ùh jah ỏi ta taneh da Chuaq;
Ep-ra-im cô èh hi wìh hlài ta Aicáp,
caq dahwèq padrùh ta A-si-ri.
- ⁴ Wì haq pi broq lè dèch am alac nho ca Chuaq,
ngè tadreo dèch am pi lem manoh ca Haq;
'benh da wì haq jah tìah ca 'benh da hnem i mangai cachit,
cabô hi caq diq loh ca amùa;
ma jah 'màng aih 'benh wì haq toq cla wì haq caq,
ùh jah 'mùt ta hnem Chuaq.
- ⁵ Pì broq cleq ta hì lè càn,
ta hì hiniang da Chuaq?
- ⁶ Joq 'nàng, 'nhac ca wì haq khoi jah claih ca bìac ranác.
Mahaq Aicáp xôq acom hlài wì haq,
Memphit catùh wì haq.
Nhat wa rôm wang jaq caq dahwèq canaq 'bac da wì haq;
brech breo hon mùt nòi traiq wì haq ỏi.
- ⁷ Hì baxa khoi trùh! 'Bài hì tabroq chao khoi trùh!
Is-ra-ên jah loq ro bìac aih.
Mangai capoch thai Boc Plình loh ca blùng,
mangai i yiang wèq manoh 'nong trong loh ca ranhùa,
taiq can ngang dù da ìh khoi bàc,

wa biac git 'bôn da ìh càn hrìn.

⁸ Au Boc Plình khoi 'nac mangai capoch thai Au
đòiq gòm rap Ep-ra-im jàn Au;
mahaq jàn Au khoi bet rahoch rìm nòi haq lam;
haq toq glàm biac git 'bôn ta hnem Boc Plình
haq.

⁹ Wì haq cram dèh ta biac tôiq lôl
tìah ca 'bài hì da Ghi-bê-a.
Boc Plình hmàng hlài ca biac ngang dù da wì
haq,
baxa tôiq lôl wì haq.

¹⁰ “Au glàm Is-ra-ên,
tìah ca glàm plì nho ta ðùng wang wê;
Au khoi hnoq boc yaq pì
tìah ca plì póc ðùm gàu mùa.
Mahaq wì haq khoi mùt ta nòi Ba-an Pêo;
am ðađeh ca ngè 'mèq 'mac,
wì loh ca ramòt tìah ca dua 'mù wì haq ma
cùh waiq.

¹¹ Biac 'ngah 'ngai da Ep-ra-im jah pan đac tìah
ca chìm - pi xa-ông,
pi ôi jiang, pi hadràp!

¹² 'Nhac ca wì haq i con ban,
Au xôq jêh đac,
trùh jò wì haq pi ôi i ca mòiq ngai mangai calô
leq.
Ranàc ca wì haq jò Au cađac wì haq.

¹³ Au khoi lah hnoq Ep-ra-im,
tìah ca phòq Tìrò jah pìt ta nòi ðùng nhat,
mahaq Ep-ra-im ep 'ràng dèh con
caiq am ca mangai jêh đac.”

- 14 Chuaq ôi, au khòh xìn Ìh am cleq
ca wì haq cô èh?
Xìn am ca pù con nga wì haq xa-ông ralàih
wa tôh ùh i ca diac tôh!
- 15 “Rìm biac ngang dù da wì haq dìq òi ta Gingan;
Au baxèm git ca wì haq ta aih.
Taiq biac ngang dù wì haq,
Au hnan wì haq loh khoi enh hnem Au;
Au pi xa-öch ca wì haq hòm.
Dìq ca 'bài cwan wì haq, aih 'bài mangai loq
blàq.
- 16 Ep-ra-im 'bìq jêh đac;
riah haq khoi croh.
Wì haq pi nui loh plì.
'Nhac ca wì jah xa-ông con
Au xôq jêh đac 'bài con ma wì haq dìq jaq
loq waq.”
- 17 Boc Plình au hi cađac wì haq,
taiq wì haq ùh tamàng bàu Haq.
Wì haq jah lam pac lac ta 'bài Diac 'noiq.

10

Is-ra-ên 'Bìq Baxa Hlài Taiq Tôiq Lôi

- 1 Is-ra-ên aih xèm nho jiang,
loh plì.
Plì top bacc dàng leq,
wì haq broq ca'bông tadreo bacc dàng aih;
taneh haq broq loh 'mau dàng leq,
haq broq 'bài jrang cùh waiq dua 'mù bacc
dàng aih.

- 2 Manoh wì haq lah baiq;
 manàiq wì haq 'bìq ta'mòq tôiq.
 Boc Plinh tùq đac ca'bông tadreo;
 raliang đac jrang dua 'mù da wì haq.
- 3 Manàiq wì haq jah doi: “Bèn ùh i ca bùa,
 taiq bèn ùh crè ca Chuaq,
 mahaq tàng i bùa,
 bùa aih broq jah cleq ca bèn?”
- 4 Wì haq capoch bàu ùh lem
 wa pachac 'nùt jò wêh jao;
 taiq 'màng aih biac hadrah baxa jah plôh
 manông hon renh
 tiàh ca nhat adrònhr padrê hon ta lai cai ta
 đam taneh.
- 5 Jàn Sa-ma-ri loh ca crè yùq
 ca 'bài dua 'mù 'bo con da Bêt Awen;
 Mangai jàn hmoi am ca haq;
 'bài pajàu tadreo ca haq hadai hmoi,
 taiq biac 'ngah 'ngai da haq khoi hnhung
 đac.
- 6 Dua 'mù cô hadai 'bìq 'ràng trùh Diac A-si-ri
 broq dahwèq dèch am ca bùa Jarep;
 jò aih Ep-ra-im jah pòq can camaih;
 Is-ra-ên jah camaih dèh ca trong ma tình
 dađeh.
- 7 Sa-ma-ri wa bùa jah hnhung,
 jah đòng hiu loh lam 'màng ca long ta riang
 diac.
- 8 'Bài 'bông tadreo da Awen,
 aih tôiq lôl da Is-ra-ên, jah raliang piang;
 hila wa long hila cađê hon
 ta ca'bông tadreo wì haq.

Jò aih, wì haq doi ca 'bài wang: “Ralàih clih ta nhèn beq!”
 wa doi ca 'bài go: “Ta-ùc enh 'nhèq ca nhèn beq!”

9 “Ô Is-ra-ên, ìh khoi broq tôiq enh hì ma òi ta Ghi-bê-a!
 Manàiq hadai òi broq tôiq!

Cô èh bìac tajêh poh jah trùh òi raliang đac Ghi-bê-a
 taiq bìac ngang dù ma wì haq khoi broq 'mòh?

10 Au khoi padon òi baxa wì haq;
 'bài jàn Diac 'noi q jah gop dabau tajraq hlài ca wì haq jò wì haq 'bìq ta'mòq baiq hiniq tôiq.

11 Ep-ra-im 'màng ca 'bo cadrì hadròng khoi hêq enh len 'mau,
 mahaq Au 'nhòq lah òi long ech ti ranõng lem da haq.

Manàiq Au ha'mac long ech ca Ep-ra-im;
 Juđa jah cai
 wa Jacôp 'bùa đeh taneh.

12 Rai ca dađeh bìac ta-atoq beq,
 wa gat can xa-öch;

Ralàm taneh neo beq,
 ma jah 'màng aih cô raq jò ti chaq Chuaq,
 trùh hloi jò Haq trùh
 wa ùc mè ta-atoq ca pì.

13 Pì khoi cai bìac ngang dù,
 gat bìac ùh ta-atoq,
 caq plì amòng.

Ma jah 'màng aih ìh khoi canòm nhò dèh trong
cla,
wa canòm ca bình ngöng mangai dèh tanuq
da ìh.

14 Taiq 'màng aih, bìac tajêh poh jah broq ca jàn
loh ca manhài manhèp.

'Bàì đôn da ìh 'bìq raliang đac
tìah ca bùa Sanman khoi raliang đac Bê-t-at-bên,
aih hì tajêh poh ma 'bài miq
wa 'bài con đìq 'bìq hwenh rapàt ta hmu wa
'bìq cachìt hech dèh ti 'bài con.

15 Ô mangai Bê-tên bìac cô hadai trùh ca ìh,
taiq bìac ngang dù da pì càn hrìn.

Plình bu 'ngah
bùa Is-ra-ên cô èh 'bìq jêh đac."

11

Boc Plình Xa-öch Ca Is-ra-ên

1 "Jò Is-ra-ên ỏi nga, Au loq waq ca haq;
Au creo con calô Au loh khoi enh Aicàp.

2 Au creo ca haq dàng leq,
haq mot ca Au dàng aih.

Wì haq khoi dèch am nègè tadreo ca Ba-an,
wa bùh jreo xua thùm ca dua 'mù.

3 Mahaq cla Au khoi hnài Ep-ra-im cadiang lam,
khoi ca'mình haq ta cöng tì;

mahaq wì haq ùh 'nì
ca Au khoi broq brêh ca wì haq.

4 Au khoi 'nong Is-ra-ên
tìah ca mangai i manoh xa-öch wa loq waq.

Au cô khoi dõih long ech enh ranöng wì haq.
Au cùp ha'neq 'noh ca wì haq dahwèq caq.

- 5 “Taiq wì haq ùh chiùq wìh hlài ta Au,
wa ùh wìh hlài ta Aicàp,
èh ep patìh bùa A-si-ri.
- 6 Chang gùm jah mùt ta phôq wì haq,
raliang đac calêh 'mang wì haq,
lõn đìq wì haq taiq trong hatình ngan dù da
wì haq.
- 7 Joq 'nàng jàn Au ì dèh manoh cađac Au.
Wì creò Au Yi Ha'nhèq,
mahaq wì haq ùh padèch iu tiaq Au.
- 8 “Ô Ep-ra-im, broq 'màng leq Au ma jah cađac
ìh?
Ô Is-ra-ên, 'màng leq Au jah cađac ìh?
Broq 'màng leq Au jah ta broq ca ìh troi Atma
loq troi Xê-bô-im?
Manoh Au mango ìq jaq;
manoh xa-öch da Au tìah ca ùnh cheo dèh.
- 9 Au padràng dèh can nòih,
ùh jêh Ep-ra-im hòm.
Ma jah 'màng aih Au Boc Plình, ùh xài con
mangai;
Au Yiang Hadròih òi ta'ne ìh,
ùh yöch can nòih lam trùh ta ìh.
- 10 Wì haq tiaq atìq ca Chuaq,
Haq grenh tìah ca baco hlari;
joq 'nàng jò Haq grenh;
'bài con caiq Haq enh mahì mùt tarìt tariang
lam trùh.
- 11 Wì haq tarìt tariang trùh enh Aicàp tìah ca
chìm pan,
enh taneh A-si-ri tìah ca chìm trù;
Au broq ca wì haq hlài òi dèh ta hnem cla,”

Chuaq doi 'màng aih.

¹² Ep-ra-im capoch bàu amòng õi dudan ca Au
wa Is-ra-ên capoch bàu 'nùt;
Juđa hadai broq bìac ùh troq tajraq hlài ca Au,
aih tajraq hlài ca Boc Plình Hadròih ma wèq
dèh manoh.

12

Tôiq Lôi Da Con Caiq Jacôp

¹ Bìac broq da Ep-ra-im aih dech 'ngwan ùh crài
cleq ca mangai hnan
tiaq cayeo hlôi pah mat mahì loh.
Haq anoi 'noh bacc tam bàu amòng wa bàu
'mèq 'mac.
Haq broq wêh jao ca A-si-ri
wa 'ràng dàu ta Aicáp.

² Chuaq pa'noh tôiq Juđa wa baxa Jacôp taiq
trong cla haq;
Chuaq tabroq chao da haq tiaq bìac haq
broq.

³ Jò õi ta cliac miq, Jacôp khoi rùp lùnh jènh dèh
daq;
jò hi càn haq tabàt ca Boc Plình.

⁴ Jacôp tabàt ca 'bình plình wa jah 'blêq;
haq hmoi wa xìn can xa-öch.
Boc Plình khoi glàm haq ta Bêten,
aih nòi ma Chuaq capoch hnài bèn,

⁵ Haq Chuaq Boc Plình ma wèq òiq ca 'bình
plình;
hiniq Haq Chuaq.

⁶ 'Màng aih ìh wìh hlài ta Boc Plình ìh beq;

wèq manoh xa-öch wa biac lem jang,
hloi hloi ngèh gòm Boc Plình ìh.

⁷ Ep-ra-im mangai padro wê 'bài kìq 'nùt;
haq toq enh caq jǒng.

⁸ Ep-ra-im khoi doi:
"Joq 'nàng au khoi wìa padrǒng can;
au khoi i bàc cùng hang ca dađeh.
Ta rìm biac au broq ùh i ca biac dù leq jah
creo tôiq lòi."

⁹ Mahaq Au Chuaq,
broq Boc Plình ìh enh jò ìh loh khoi enh
taneh Aicàp.

Au am ìh tawìh rìh ǒi ta 'bài traiq,
tiàh ta 'bài hì lè càn.

¹⁰ Au khoi am bàu ca mangai capoch thai Boc
Plình;
khoi broq bàc tam biac mahno 'noh
wa nhò 'bài mangai capoch thai Boc Plình
yǒc bàu aliah hnài pì.

¹¹ Ga-la-at haq ngang dù.

Joq 'nàng wì haq ùh i lòi q cleq!
Wì haq dèch am ngè tadreo xam 'bo calô ta
Gingan,
'bài ca'bǒng tadreo da wì haq 'màng ca hmu
raga ha'ngùc
kenh lai cai ta ðùng tamang.

¹² Jacôp lam mot ta taneh Aram;
Is-ra-ên lam broq hapǒng ðòi q jah i mai,
taiq enh waq mai haq ep lam ban trìu.

¹³ Mahaq nhò mangai capoch bàu thai ca Chuaq,

Chuaq khoi 'ràng jàn Is-ra-ên loh khoi ca
Diac Aicàp,
wa nhò biac broq da mangai capoch thai
Chuaq haq khoi jah wèq ban.

- ¹⁴ Ep-ra-im broq ca Au plôh nòih;
taiq 'màng aih Chuaq haq ùc hlài manoh
ta'mòq tôiq ca cla haq,
Chuaq tabroq chao da haq biac camaih.

13

Ep-ra-im Cùh Waiq Dua 'Mù

- ¹ Jò Ep-ra-im capoch, wì yùq crè tarit tariang.
Haq khoi jah padèch ta Is-ra-ên.
Mahaq taiq haq broq tôiq cùh waiq Ba-an,
'màng aih haq phai cachit.
- ² Manàiq, wì haq broq tôiq rai èh rai bàc;
yõc wang 'bac broq ca dadèh dua 'mù,
broq dua 'mù tiaq dèh manoh rabiaq cla;
aih dìq biac da tì mangai thòq rabiaq broq
loh!
- Wì doi ca dabau:
“Hìp 'bo cô beq hi khoi dèch am nègè tadreo
ca haq.”
- ³ Taiq 'màng aih, wì haq tìah ca hiloc jò daxroq,
tìah ca diac ngom jò daxroq,
tìah ca aròm cayeo hlôi haprah enh xàn len
'mau,
tìah ca nhò ùnh loh enh woi nhò!
- ⁴ “Mahaq Au Chuaq Boc Plình ìh khoi 'nong ìh
loh khoi enh tanèh Aicàp;
enh gùng ca Au,
ìh ùh jah cùh waiq yiang leq ma 'noiç,

enh gùng ca Au ùh i ca Chuaq Dèch Claih ma
'noiç!

⁵ Au khoi ban ìh ta ðùng braih càn,
ta nòi taneh croh crenh.

⁶ Au am wì caq panàc,
mahaq jò hi mech wì haq loh ca i manoh
catèh dađeh;
taiç 'màng aih wì haq hèt ca Au.

⁷ Taiç 'màng aih, ca wì haq Au jah tìah ca baco
hlari,
tìah 'beo rap wì haq ti kenh trong.

⁸ Au glàm wì haq tìah ca higàu ma 'bìç wì rùp
da haq con.
Au hich rada wì haq;
lõn wì haq 'màng ca baco hlari can.

⁹ “Ô Is-ra-ên, ìh jah raliang piang taiç ìh tajraq
hlài ca Au,
Au cô raq ma jah jùp ðò ìh.

¹⁰ Manàiq bùa ìh ta leq ðòiq haq dèch dõih ìh!
'Bài cwan hadrah ìh ta leq,

aih wì ma pì khoi xìn:

‘Am ca nhèn mòiç toq bùa wa cwan!’

¹¹ Ta jò nòih, Au khoi am ca ìh mòiç toq bùa,
wa ta jò nòih Au don đac.

¹² Bìac ngang dù da Ep-ra-im khoi jah achaoq
ðòiq wa tôiq lôi da haq khoi jah haniuç gop.

¹³ Bìac jìç xa-ông da gu cadrì jah trùh ta haq.
Mahaq haq ùh waç;

taiç khoi trùh

jò haq xôç ùh loh khoi enh cliac dèh miç.

14 “Au khòh dõih wì haq claih khoi ca cwìang da
 can cachit ùh?
 Au khòh rõt hlài wì haq claih khoi enh can
 cachit 'mòh?
 Ô can cachit, 'bài hila ìh ta leq?
 Ô Ralùng Hanang, can jìq da ìh ỏi ta leq?

“Can xa-öch khoi cadoc hlèp hangai ca mat Au.
 15 'Nhac ca Ep-ra-im i con bàc yi hnao ca oh
 daq dađeh,
 mahaq cayeo pah mat mahì loh,
 aih cayeo da Chuaq hlôi tõi enh braih càn;
 gõi diac haq jah wìa xõt wa diac mống haq wìa
 croh;
 cayeo aih tablah yõc 'bài hang canaq ta kho.
 16 Sa-ma-ri ep pòq tôiq,
 taiq haq khoi blàq Boc Plình!
 Wì haq cachit ca pla chang;
 chac hamac con 'yoh 'bìq jôq nanit đac,
 wa 'bài gu cadrì ỏi jiang 'bìq pah cliac.”

14

Pariaq Thê Cađac Dèh Tôiq Lôi

1 Ô Is-ra-ên, wìh hlài ta Chuaq Boc Plình ìh beq,
 taiq tôiq lôi ìh broq ca ìh tacro.
 2 Pì waiq khàn dang xìn
 wa wìh hlài ta Chuaq beq.
 Doi ca Haq bàu cô:
 “Xìn cađac rìm biac ngang dù nhèn con,
 wa nhàn hlài nhèn xam manoh xa-öch,
 òiđiq nhèn con jah dèch bàu manè apôi ti blìa
 hacùng nhèn.

3 A-si-ri ùh jah dèch dõih nhèn,
 nhèn ùh còi hòm axêh tajêh;
 dua 'mù tì nhèn khoi broq, nhèn pi anoi hòm: 'Pi
 raq Boc Plinh nhèn,'
 ma jah 'màng aih toq õi ta ìh raq,
 èh mangai ma lac jah Ìh xa-õch!"

4 Au jah broq brêh biac blàq blènh da wì haq.
 Au xa-õch ca wì haq dìq ca jaq;
 ma jah 'màng aih can nòih da Au khoi wia
 khoi ca wì haq.

5 Au jah tiah ca diac ngom am ca Is-ra-ên;
 wì haq jah loh riang tiah ca riang tacreo,
 wa grap riah tiah ca long hùang nam ta Liban.

6 'Bài hamenh nga da haq jah hlàng loh
 hangai;
 can lem da haq tiah ca can lem da long ôliu,
 hòi xua thùm da haq tiah ca hòi xua thùm
 da long hùang nam ta Liban.

7 Wì ma rìh õi ti yàp long haq,
 jah broq loh 'mau hòm;
 jah loh riang tiah ca long nho.
 Tìang 'bang haq jah loh càn tiah ca alac nho
 Liban.

8 Ô Ep-ra-im, Au jah i biac cleq ca 'bài dua 'mù
 'mòh?
 Au raq khoi rùp bàu wèq ngan ìh.
 Au tiah ca long preo ma jìang;
 nhò Au ma ìh jah i plì.

9 Mangai leq rabiaq chaq loq biac cô beq!
 Mangai leq ragài chaq loq biac aih beq!
 Ma jah 'màng aih 'bài trong da Chuaq tajang;

'bài mangai rìh ta-atoq jah cadiang lam ta
aih,
mahaq 'bài mangai broq tôiq èh tacro ta aih.

Sech Hadròih
Sech Hadròih

copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo

All rights reserved.

2020-11-17

PDF generated using Haiola and XeLaTeX on 22 Feb 2024 from source
files dated 29 Jan 2022

e5023a07-9831-5256-a315-1cae0f33043d